

東強縣志卷第八

陽湖楊元錫

蕭縣任銜蕙 同纂

建置志

城池

舊城當黃河之衝金天會四年河大漲溢城陴樓堞悉沒至十年遷於縣西三十里劉馬村即今縣治也築土為城週方四里高二丈八尺池稱之為門三東曰通齊南曰接魯西曰仰恒明成化六年典史于晟因舊址重修之其後知縣佟玉徐讚相繼建門樓三角樓四正德六年知縣段彥添修完雉堞一千二百五十有奇隍闊

東強縣志卷八 建置志

五尺七年知縣張文淵築護城堤嘉靖二十九年知縣張銀重修築城高於舊者五尺基廣於舊者七尺池深於舊者又五尺城上土陴悉易以磚又添敵臺及月城重門俱設樓雉萬曆四年知縣南憲仲加高培厚三門起樓重簷飛甍四隅角樓並敵臺邏鋪女牆睥睨堞以磚石每壁添水道一十二建西門月城外橋一北城上重樓一題曰神京在望更題東門曰渤海縈回南曰岱宗仰止西曰常山盤踞堤外環植以柳崇禎八年知縣王士英修補廢壞堞外塗茨城下外築一墻基厚丈餘高稱之頂固以磚中留炮眼可藏兵數百人城上內建女牆崇禎十三年知縣沈戩穀於三門月城外各建敵



臺空其中下爲小門以通女牆便往來更題東門曰賓  
嶠西曰餞日南曰鷹揚發跡

國朝順治十七年城樓角樓風雨損壞知縣何之圖修飾  
復舊繼此雖小有補葺委之地方苟且塗飾非復往日  
之規模矣迄今垣墉僅存樓堞盡廢乾隆十三年奉文  
議修計需費二萬三千七百十兩有奇不果行乾隆十  
七年知縣單作哲建三門月城外橋各一座  
先是每歲  
令臨城八  
地方出資繕橋民甚苦之前令趙果革除而本土之質  
漸就朽腐今易爲磚洞可以永久後之君子其因時補  
葺焉

### 公署

縣署居城之中大堂三間南向前爲月臺甬道又前爲

棗強縣志卷八 建置志

二

戒石坊又前爲儀門三間東西爲角門又前爲大門一  
座上有譙樓三間又前爲照壁大堂下左翼爲吏戶禮  
倉總房鹽房十間右翼爲兵刑工架閣庫承發房招房  
十間民壯守夜房一間茶房一間儀門外東爲民壯房  
三間快手房二間大堂後西爲聽事房一間宅門一座  
向南爲靜治堂三間東西簽押房各一間靜治堂下東  
爲門房三間門房後屋三間靜治堂後爲內宅門後爲  
三堂三間東西廂房各三間後爲東西從房各三間北  
樓三間靜治堂東爲書廳三間後過道三間又後爲植  
德軒三間西廂房三間迤東爲幕客廳二層共七間茶  
房一間後爲廚房二間後北房三間東房二間靜治堂



西南爲喬蔭棠枝之館北向四間西廂房三間北爲留雲榭三間南向西從房六間再後爲漱六齋三間西從房三間餘房不載庫在大堂東偏獄在儀門內西偏有獄神祠儀門外東爲土地祠又東爲倉神祠迤北爲倉廩又北爲廩有馬神廟

衛

案胡單二志云縣署於明洪武九年知縣李源

清建永樂三年知縣趙禮重修爲牧愛堂三間堂左爲庫又東爲庫樓右爲幕廳今俱廢嘉靖三十五年知縣羅廷唯於署東建葵心亭三楹今廢隆慶二年知縣王淑陵於儀門外建寅賓館三楹萬曆二年知縣牛若虛樹題名碑於堂左知縣南憲仲移譙樓少北崇壘爲臺上樓下門樓外爲照壁十一年知縣陳人登易戒石亭爲坊重修寅賓館今廢十三年知縣郭東光建豁然亭於館後

國朝康熙六年知縣胡夢龍典史陸文允重建今廢乾

隆三十五年先君子蒞任見堂室俱歲久不修傾

欻欲墮隨卽修整譙樓加築照壁樓西稍後建南北高牆一道重整戒石亭移建大堂添置月臺修甬道

建二堂於堂東建書室修三堂添平房三間拆修主

樓樓西添平房九間再南添平房八間正房三間并

重新大書房計所費金千六百有奇

衛

時隨侍左

右見鳩工庀材修飭嚴整所以貽後人者遠矣越三



十年為嘉慶庚申

銜蕙

復捧檄至此見從房雖稍有

所更而依然舊日之規模也辛酉夏大雨水屋多漏

濕爰再加修葺并建喬蔭棠枝之館作聯額懸之以

誌先德並以自勉云

二堂聯云在昔趨庭五年中家訓官方迴首全成治  
譜於今守土卅載後心勞政拙撫躬利有清風植德  
軒額跋云廣川官舍向來湫隘先君子宰是邑時  
以二堂後東北隅之室為內室越二十六年銜蕙復  
捧檄來署中房屋率多改易惟此室三楹尚仍其舊  
迴思曠昔問寢視膳恍如昨日因於砌前植襟花十  
餘本一年後皆盛敷榮遂以植德顏其額喬蔭棠枝  
之館聯云官舍如傳舍何期肯構肯堂重營少小橫  
經地忘家卽克家惟有矢勤矢慎不失清貧作吏風  
匾額跋云乾隆庚寅先君子宰廣川銜蕙隨侍官  
舍讀書於大堂之西偏凡歷五載嘉慶庚申銜蕙捧  
檄繼宰是邑曩時書齋鞠為茂草辛酉大雨水房舍  
多圯次年乃卽書齋舊址重建三楹以為宴集之所  
因取父子相承之義與勿剪勿伐之思以顏其額並

棗強縣志卷八

建置志

四

為聯語敬誌無忘

縣丞署向在縣署東久廢今僦居民舍

典史署在縣署西大堂三間前為二門三間書役房四

間頭門三間前為照壁大堂後為宅門門房二間東為

書房二間西為客廳三間又南為書房三間宅門後為

內房六間西廂房二間東為廚房二間餘房不載

案典史署創建無考舊志云明永樂三年知縣趙禮

重修縣署大堂後為知縣宅東為縣丞宅西為典史

宅想卽於是時創建

教諭署在儒學明倫堂西大門一座南向前為照壁二

門一座堂三間內宅門一座內房五間東西廂房六間



從房四間餘房不載

訓導署在教諭署西大門一座南向前為照壁二門一座堂三間內宅門一座正房三間書房前後四間從房五間餘房不載

案學署創建無考舊志明宏治八年知縣張環修學并修官師宅三所明代設訓導二員後裁一缺併為二也

國朝嘉慶二年教諭邊時舉訓導李綸盛重修

陰陽學舊在東察院前明洪武十八年知縣曹禮建嘉靖三十二年知縣田大壯改建縣治東久廢

醫學在縣治西明知縣曹禮建嘉靖十五年知縣李天

棗強縣志卷八 建置志

五

成重修久廢

僧會司在崇教寺

道會司在凌雲觀

公所

萬壽宮在東門外乾隆十六年知縣單作哲建 正殿三間

東西朝房各五間大門一座東西角門各一外為屏垣

東西坊門各一東曰瞻雲西曰就日

皇華館在縣西三里明萬曆九年知縣陳人登建久廢

廨舍

北察院舊在縣治西北即大原書院舊址明萬曆十一年知縣陳人登改建久廢



西察院舊在縣治西南久廢

東察院舊在縣治東南久廢

演武場舊在南郭門左明嘉靖十四年知縣李天成移郭門右建廳事三楹久廢每歲霜降祭旗纛神於此

### 倉儲

預備倉舊在縣署西北隅久廢

案胡志預備倉官亭三楹北廡五座十九間南廡四座十八間東廡二座八間西廡二座九間繚以周垣大門東向廢

常平倉在縣署東廡十二座共五十間乾隆十三年定制額貯穀二萬石

喪強縣志卷八 建置志

六

社倉久廢今附貯常平倉內

義倉舊志云在大原書院久廢乾隆十六年知縣單作哲新建十處東路吉里曹莊南路恩察大營石佛頭西路趙子諫陽谷北路杜煙邢村陳贊每處瓦倉二間倉門一座倉夫房一間繚以周垣貯士民捐輸義穀

### 兵防

棗邑汛員單志云案州志雍正八年設外委千總一員馬兵三名步兵三十一名現在城守外委千總一員馬兵四名步兵二十名屬正定鎮標右營管轄

### 舖遞

總舖在縣治前



崔村舖在縣西十里遞冀州

蕭張舖在縣西北二十五里遞衡水武邑縣

### 墩堡

城西五里墩十里崔村舖墩達冀州

城西南十里陽谷莊墩十五里楊莊墩二十五里卷子

集墩達南宮縣

城南十里康莽墩二十五里恩察墩四十五里大營墩

達廣平府清河縣

城東七里營墩十五里王家莊墩二十五里倉房口墩

三十里舊縣墩達山東德州

城東北二十五里流常集墩達河間府阜城縣

《棗強縣志卷八

建置志

七

城北五里衡店墩十五里里倉口墩三十里趙莊墩達

武邑縣

城西北十里杜煙墩十五里河西墩二十五里蕭張集

墩達衡水縣

卷子堡方圍六百步高一丈六尺基闊二步四尺頂闊

一步三尺

大營堡方圍六百步高一丈六尺基闊三步三尺頂闊

二步

流常堡方圍六百八十步高一丈二尺基闊二步頂闊

一步二尺

蕭張堡方圍七百三十步高一丈五尺基闊二步頂闊



一步

案墩堡俱里民自爲繕修漸就圯毀甚非前人備守望捍牧圉之遺意易曰節以制度不傷財不害民又曰說以使民民忘其勞是在司牧者

市集

大集七

在城集二七四九日

蕭張集一六日

流常集三八日

恩察集三八日

望軍集五十日

嘉強縣志卷八

建置志

八

卷子集一六日

大營集五十日

中集五

白塔集二七日

婁子集二七日

吉里集一六日

崔母集四九日

舊縣集二七日

小集八

嘉會集一六日

陳贊集一六日



劉村集四九日

里林召集三八日

良黨集四九日

周村集二七日

史家屯集二七日

王灘集四九日

案棗邑居民稠密其村落稍大者各為期日貿易薪蔬亦名曰集以非輻輳之區不具載

坊表

縣前坊曰右輔名封東曰承宣西曰保障

北察院街坊曰乘驄要路察院前坊東曰建節西曰觀

棗強縣志卷八 建置志

九

風

城隍廟坊曰綏萌保境

玉帶街坊曰關帝行祠

進士坊為進士李暘

攀桂坊二為舉人賈琬楊智

父子聯芳坊為舉人江淪江濂

登雲坊為舉人袁霖

步月坊為舉人盧寧

折桂坊為舉人李方

經亞坊為舉人李員

光榮坊為舉人李梅



登庸坊爲舉人錢錫

兄弟聯芳坊爲舉人陳希東陳希南

天府題名坊爲舉人邱如崑

勅封御史坊爲毛澤

都憲坊爲副都御史毛鵬

經筵侍郎坊爲御史陶應龍

勅封繡豸坊爲史瀛

柱史坊二爲御史張士奇李自謙

文武傳芳坊爲御史史思敬指揮史思補

地官坊累朝顯進坊爲郎中何思問

鳴贊坊爲序班袁讓

棗強縣志卷八

建置志

十

宮僚坊爲序班袁雲

徵仕郎坊爲經歷范鼎

奕世褒封坊爲贈知縣王宗卿

彤庭肅儀坊爲序班屈際昌

金門典禮坊爲序班鄭方

罷渥闕庭坊爲兵馬司副指揮李遂

金闕禮臣坊爲序班張良翰

案各坊今皆圯廢其建置年月無考姑仍舊志至新建節孝坊已註於各列女傳下不再錄

郵政

養濟院在縣治西南



銜蕙

案創建無考共瓦屋十七間乾隆三十六年

先君子捐俸重修有記勒石

留養局五

在西關者一在四鄉者四蕭張流常卷子大營各一  
漏澤園舊在邑屬壇南歲久瘞盡

義塚四

在東郭外者二一地十二畝嘉靖四十年邑人毛澤  
捐一地五畝萬曆二十八年縣丞盧蕃捐

在西郭外者一地六畝

在南郭外者一地五畝俱萬曆四十三年知縣王鶴  
給捐

橋梁

義和橋在縣東北花園村

毛莊橋在縣東

呂睦橋久廢

壇廟

社稷壇在西郭門外

壇制東西二丈五尺南北如之高三尺一成用營四  
造尺

出陛各三級繚以周垣四門朱色自北門入壇南正

中立石主一去壇二尺五寸露圓頂餘埋土中壇西

北隅設瘞坎一成甃砌東向寬四尺深三尺西面作

踏道上下



謹案周禮大司徒設其社稷之壇而樹之田主各以其野之所宜木遂以名其社與其野小司徒凡建邦國立其社稷封人凡封國設其社稷之壇令社稷之職祭法諸侯為百姓立社曰國社諸侯自為立社曰侯社大夫以下成羣立社曰置社郊特牲社祭土而主陰氣也陳氏禮書曰社所以祭五土之示稷所以祭五穀之神稷非土無以生土非稷無以見生生之効故祭社必及稷以其同功均利而養人故也文獻通考漢高祖二年命縣為公社十年令縣常以春二月及臘祠稷以羊彘光武建武二年使郡縣置社稷太守令長侍祠牲用羊豕隋開皇初建社稷以仲春仲秋吉戊祭郡縣並以少牢各祭唐開元禮以春秋仲月上戊祭郡縣惟春秋二祭淳熙七年用齊慶胄言頒淳熙編類祀祭儀式於諸州朱子有州縣社稷壇說元史至元十年頒諸路立社稷壇儀式明史洪武元年頒壇制於天下郡邑俱設於本城西北右社左稷十一年定同壇合祭如京師十四年令三獻皆以文職長官武官不與  
清會典順治初定府州縣每年春秋仲月上戊日祭祭品刊圖通行

風雲雷雨山川壇在南郭門外

東強縣志卷八 建置志

三

壇制東西二丈五尺南北如之高三尺一成四出陛各三級繚以周垣四門朱色自南門入壇北正中立石主一去壇二尺五寸露圓頂餘埋土中壇東南隅

設燎鑪一座甃砌西向

謹案周禮天宗伯以禋燎祀司中司命鬯師雨師以狸沈祭山林川澤文獻通考秦始皇時雍有風伯雨師廟以歲時奉祠東漢以丙戌日祀風師於戊地巳丑日祀雨師於丑地牲用羊豕隋於國城東北七里為風師壇祠以立夏後申壇皆三尺牲並用一少牢唐雨師壇祠以立夏後申壇皆三尺牲並用一少牢唐天寶四載勅風伯雨師濟時育物謂之小祀頗紊彝倫自今已後並宜升入中祀仍令諸郡各置一壇因春秋祭社之日同申享祀祭官取太守以下充五載詔曰發生振蟄雷為其始今雨師風伯久列於常祠惟此震雷未登於羣望已後每祀雨師宜以雷師同壇祭其牲別宜祭器宋皇祐初定風師壇高三尺周三十二步雨師雷師為二壇同地其祀則用栢升烟明更年以雨師雷師為二壇同地其祀則用栢升烟明更



增雲師於風師之次太祖時禮臣言風師兩師之祀見於周官後世皆有祭唐天寶中增雷師於兩師之祀次宋元因之然唐制各以時別祭失享祀本意宜以太歲風雲雷雨台為一壇嘉靖十年建太歲壇別祭仍勅王國府州縣亦祀風雲雷雨師築壇城西南祭用驚蟄秋分日洪武二年太祖以嶽瀆諸神各祭城南未嘗有專祀又享祀之所屋而不壇非尊神之道禮官集議以嶽鎮海瀆及天下山川城隍合為一壇春秋專祀其王國府州縣山川之祀洪武十三年定制國朝乾隆二十二年三月禮部議覆陝西巡撫陳宏謀咨稱致祭社稷壇定於春秋仲月上戊致祭山川宜祇載春秋仲月未奉定有祭期會典亦未載有祭日等語今擬山川之神於春秋仲月與社稷壇同日致祭請載入會典永遠遵行

先農壇在東郭門外迤南雍正六年建

壇制東西二丈一尺南北如之高二尺一寸一成四出陛各三級繚以周垣三門朱色自南門入壇北建

正房三間中奉神位東貯祭器農具西貯耜田米穀東西配房各一間東置

東強縣志卷八 建置志

三

祭品西住看壇農民壇東南隅設座坎一成西向寬四尺深三尺東面作踏道上下

謹案月令天子以元日祈穀於上帝乃擇元辰天子親載耒耜帥三公九卿諸侯大夫躬耕帝藉天子三推三公五推卿諸侯九推周禮甸師掌帥其屬而耕耨王藉以時入之國語農正陳藉禮韋昭注敷陳藉禮祭其神為農祈也文獻通考漢舊儀春始東耕於藉田官祠先農後漢藉田儀正月始耕以乙日祠先農及耕於乙地是月命郡國守皆勸人始耕宋元嘉二十一年將親耕整制千畝立先農於中阡西陌南御耕壇於中阡西陌北以一太牢祀先農班下郡國悉備其禮梁普通二年移藉田築兆城如南北郊別有觀耕臺在壇東唐垂拱中改藉田壇為先農壇宋神宗元豐二年詔於京城東南度田千畝為藉田徙先農壇於其中明史洪武二年建先農壇於南郊在藉田北祀儀與社稷同祀舉行耕藉禮

厲壇在東郭門外迤北

謹案祭法王祭泰厲諸侯祭公厲大夫祭族厲士喪禮疾病禱於厲鄭注謂漢時民間皆祀厲春秋傳曰



鬼有所歸乃不為厲唐開元禮七祀秋祭厲文獻通考宋秋祀厲牲用羊豕明史洪武三年定制京都祭秦厲壇歲以清明及十月朔遣官致祭前期七日檄京都城隍祭日設城隍神位於壇上無祀鬼神等位於壇上之東西羊三豕三飯米三石王國祭國厲府州祭郡厲縣祭邑厲皆設壇城北一年二祭後定郡邑厲壇皆以清明日七月十五十月朔日

關帝廟六

一在縣署東玉帶街北明萬曆二十六年重建有行太僕寺少卿史思敬碑記

國朝嘉慶元年知縣江元謙重修

一在東關北街創建無考明萬曆十一年修

國朝康熙三十年重修

一在西門甕城內明萬曆四年建

棗強縣志卷八 建置志

古

一在西關南街明嘉靖二十六年建

國朝嘉慶四年重修

一在南關東街明萬曆二十一年建

國朝乾隆四十七年重修

一在大營村西街明嘉靖三十四年重修

謹案三國蜀志

關帝仕漢為前將軍漢壽亭侯後主景耀三年追諡曰壯穆侯見華陽國志靈跡自隋始顯宋徽宗崇寧元年封忠惠公後又封崇寧真君大觀三年封武安王淳熙十四年封英濟王元史祭祀志世祖時大明殿啟建白傘蓋佛事有擡昇監壇漢關某神轎軍文宗本紀天曆元年封為顯靈義勇武安英濟王遣使祠其廟明萬曆十八年封協天護國忠義帝四十二年遣司禮監李恩捧旒袍封三界伏魔大帝神威遠振天尊關聖帝君

國朝順治九年 勅封忠義神武大帝雍正三年



勅封帝三代為公乾隆二十五年改諡神勇三十三年

勅封忠義神武靈祐大帝

城隍廟在縣治西

銜蕙

案胡單二志云明洪武初建嘉靖十三年知縣

李天成修萬曆四十四年知縣王鶴齡重修

國朝乾隆三十六年先君子捐俸重修殿廡有記載

藝文嘉慶丑年知縣李三晉重修工未竣以陞任去

銜蕙 莊任後一載落成有記泐石

謹案明史洪武二年禮官言城隍之祀莫詳其始先

儒謂既有社不應有城隍故唐李陽水縉雲城隍

記謂祀典無之惟吳越有之然成都城隍祠李德裕

所建張說有祭城隍之文杜牧有祭黃州城隍文則

不獨吳越為然又蕪湖城隍廟建於吳赤烏二年高

齊慕容儼梁武陵王祀城隍皆出於史又不獨唐而

已宋已來其祠遍天下或錫廟額或頒封爵至或遷

於他會各指一人以為神之姓名案張說祭荊州城

棗強縣志卷八

建置志

五

隍文曰城隍是保阡庶是依則前代崇祀之意有在

也今宜附祭於嶽瀆諸神之壇乃命加以封爵府為

威靈公秩正二品州為靈佑侯秩三品縣為顯佑伯

秩四品命詞臣制文以頌之三年詔去封號止稱某

府州縣者守令主之又定廟制高廣視官署治事在各

府州縣者守令主之又定廟制高廣視官署治事在各

事而祭其立祠則見於唐李德裕之在成都宋以來天下通祀

裕之在成都宋以來天下通祀

龍神祠在西郭門外迤北

案祠屋三間門一間繚以周垣旁鑿井為龍潭乾隆

五十一年知縣蒯祖炳建

謹案周禮大宗伯以醴辜祭四方百物又獻通考唐

開元二年詔祠龍池又詔置壇及祠堂宋大觀四年

八月詔天下五龍神皆封王爵青龍神封廣仁王赤

龍神封嘉澤王黃龍神封孚應王白龍神封義濟王

黑龍神封靈澤王

大清會典雍正二年

勅封四海龍王之神東曰顯仁南曰昭明西曰正恒北曰

崇禮



勅封

畿輔龍神於雍正元年順天佑畿時應龍神

東嶽廟在東郭外

案單志明嘉靖三十八年重修

國朝乾隆十七年改建每歲三月二十八日祭今圯

謹案文獻通考唐開元中用天台道士司馬承禎言封泰山神為天齊王禮秩加三公一等宋大中祥符元年加贈為仁聖天齊王五年加上東嶽曰仁聖天齊帝元史至元二十八年加上東嶽為天齊大生仁聖帝明史洪武二年去前代所封名號稱東嶽泰山之神

八蜡廟在東郭外

案單志舊在城西明隆慶三年知縣王淑陵移建東郭門外久廢

國朝乾隆十七年知縣單作哲移建東嶽廟後並設

棗強縣志卷八 建置志

七

劉猛將軍神位五十八年三月知縣蔣耀祖重修有碑

記

謹案蜡祭始於伊耆氏而流傳既久荒遠難稽乾隆十年廷臣有議修復者奉特旨停罷但各府州縣舊有廟祀春秋報賽順民俗以祈神佑未便廢撤亦有其舉之之義也

文昌祠在東門內學宮東偏

銜憲 案單志云明萬曆二十五年知縣李夢熊建

國朝乾隆三十七年 先君子重修有記

謹案史記天官書斗魁戴匡六星為文昌一曰上將二曰次將三曰貴相四曰司命五曰司中六曰司祿周禮大宗伯以禋燎祀司中司命是則文昌之祀古矣春秋文耀鉤云文昌宮為天府孝經援神契云文昌宮後世以梓潼帝君為文昌豈星精所化如傳說者精所聚昌者揚天紀輔拂並居以成天象故曰文昌宮東方朔那



魁星祠

案單志舊在東城門樓久圯邑人都御史鄭端移建於城東南隅

魁星閣在學宮東偏

衡蕙

案乾隆十七年知縣單作哲建三十七年先君子捐俸重修

馬神廟在縣署東

案單志舊在縣治西南久廢乾隆十六年重建

謹案周官校人春祭馬祖天駟星也夏祭先牧始養馬者秋祭馬祖始乘馬者冬祭馬步乃神之災害馬者隋用周制祭以四仲之月唐宋因之明洪武二年定以春秋二仲月甲戌庚日致祭五年并諸神為一壇歲止春祭永樂十三年立馬神祠今天下廢牧所在皆祀之

棗強縣志卷八 建置志

七

土地祠在儀門外

案單志乾隆十六年改建

謹案土地之神未詳其始蓋即社也先儒謂里社則祭一里之地州社則祭一州之地侯社則祭一國之地王社則祭天下之地月令廣義社公社母不食宿水故當社時必有雨禮運命降於社之謂殺地鄭注云社土地之主也其稱本此

倉神祠在縣治東

獄神祠在儀門西偏

案單志乾隆十六年改建

真武廟五

- 一在縣治東文昌街北明嘉靖十九年建今圯
- 一在西關西街明萬曆十二年建



一在西關北街明萬曆二十四年建

一在大營東街創建無考乾隆四十八年重修

一在南吉里村明嘉靖二十一年村人孟富捐募創

建有訓導張應魁碑記

真武閣在南關明萬曆三十八年建

國朝乾隆四年重修有御史陶彝碑記

謹案明史北極佑聖真君者乃元武七宿後人以為真君作龜蛇於其下宋真宗避諱改為真武靖康初加號佑聖助順靈應真君洪武間嘗建廟南京圖志云真武為淨樂王太子修煉武當山功成飛昇奉上帝命鎮北方被髮跣足建皇

藥王廟在東關迤南

案胡志明萬曆二十六年建

國朝乾隆五十年重修

謹案祭法法施於民則祀之先醫之祀猶不失古意

元壇廟在南關外

案明正德十五年建

國朝乾隆六年重修五十二年生員王岳鎮牌民王忠

順等又修有知縣蒯祖炳碑記

三皇廟在南門內興福寺

案胡志明崇禎五年建

謹案元史元貞元年命郡縣通祀三皇廟以勾芒祝融風后力牧之神配黃帝之臣俞跗以下十人載醫書者從祀明史明初仍元制以三月三日九月九日通祀三皇洪武四年命天下郡縣毋得褻祀

天清會典順治元年定每年春二月冬十一月上甲日遣官致祭



火星廟在西關路北

案創建無考明萬曆二十一年修

國朝乾隆五十五年重修

謹案文獻通考宋仁宗慶曆中修大火祠三月九日祀之以闕伯配徽宗崇寧元年詔天下建崇寧殿並建火德星君殿日下舊聞以六月二十二日祀火德之神

三官廟三

一在縣治西南今廢

一在小營村明嘉靖四十四年村人鄭考創建有御

史陶應龍碑記

一在十八杭村西明嘉靖三十年鄭祉建有陶應龍

碑記

棗強縣志卷八 建置志

九

謹案文獻通考政和三年議祀局上五禮新儀立夏季夏土王日祀中太一宮靈貺殿太歲在中太陰在西天地水三官暨諸神並為從祀

大清會典凡祈雨詣廟行香祈晴如之

名宦祠舊在西郭門外明知縣王淑陵移學東久廢

國朝乾隆十七年知縣單作哲重建

案祠祀明知縣李源清縣丞楊琛知縣姜昂知縣徐讚知縣殉難贈太僕寺少卿段身知縣南憲仲昌朝總督三省李蔭祖總督三省張存仁總督尚書朱撫直隸巡撫王登聯巡撫直隸諡清惠金世德巡撫直隸諡清端于成龍巡撫直隸諡文清格爾古德刑部尚書巡察直隸諡敏果魏象樞直隸巡撫郭世隆巡撫直隸歷官大學士諡文貞李光地巡撫直隸諡襄勤于成龍巡撫直隸加總督銜趙宏燾提督順天學政熊伯龍直隸總督諡敏恪方觀承

鄉賢祠在名宦祠南今圯

案祠祀元征南統兵大帥鄭天叙天倫明參政宋欽衛輝知府崔灝鴻臚寺序班袁讓長史錢錫都御史



毛鵬內鄉知縣李方生

忠義孝悌祠在鄉賢祠南今圯

案祠祀漢呂步舒北魏太子中庶子振威將軍賈秀冠軍將軍賈禎贈東清河太守賈景儁明彰德知府李自謙孝子江雲鶴先自正丁三省楊一柱趙登啟張應龍安昌運掌柱忠義生員范繼仁義行袁榮單

祥

國朝湖廣右布政李嵩耒陽縣知縣殉難崔燦孝子吳仲廣吳仲大吳祥瑞張桐義行王登梯慈應節林三蘇川楚出師陣亡馬兵徐科戰兵姜禮泰王玉鳳蘇

成功 屈楷

節孝祠在縣治西雍正元年建

案祠祀明貞烈張金鏡等俱載列女傳茲不重列

太公廟在西郭外久圯

董子祠在縣治西

棗強縣志卷八 建置志

三

案順治十七年知縣何之圖置祭田六十畝乾隆十一年知縣趙杲重修歲久傾圯嘉慶八年知縣任銜蕙卽舊址重建

段公祠

祀明知縣殉難贈太僕少卿段彥在西郭門外久圯

楊公祠

祀明知縣楊九韶單志云舊在東察院前久圯明崇禎八年移西郭門外亦圯

國朝乾隆十一年知縣趙杲重建於縣治西今亦圯

案楊公祠有祭田二十畝

南公祠



祠明知縣南憲仲單志云舊在縣治西南明萬曆五年移西郭門外久圯

寺觀附

興福寺二

一在城內縣治南明洪武中建

一在里祥村

廣教寺在北吉里村

案元至正元年創建明宣德八年重修今廢塔尙存  
觀音寺四

一在西關

一在小堤村

棗強縣志卷八 建置志

五

一在贊里村

一在史家屯

西明寺在舊縣村

案明宏治五年重建今廢胡志八景之二曰西明幻影注云有遇雨者避一山門下霽後鳥有掘其處得鐵佛因建

清涼寺在大波村

案乾隆四十七年重修有袁起莘碑記

石佛寺二

一在文登村

一在里倉口



嘉會寺在嘉會村

興國寺在崔濟村

崇興寺二

一在舊路村

一在婁子村北街

華嚴寺在雅科村

開元寺在呂卷村

龍寺在水堤村

案明成化二十二年建

甘露寺在婁子村

案元至正十二年僧文慶創建明宏治八年重修有

棗強縣志卷八

建置志

三

知縣張環碑記

普興寺在王灘村

案元至正十二年僧文政創建明成化十八年重修

有盤屋張銘碑記

洪福寺在李村

案元至正三年創建明正德三年修

國朝嘉慶八年僧宣彩重修有香火地五十畝

福勝寺在宅城村

案元至正間創建明成化二十二年王子萬重修

國朝乾隆五十四年張士報等捐修

水月寺在小滕村



崇教寺在陳贊村

案舊名龍回寺宋真宗咸平元年建後圯明宣德元年重建改今名成化三年重修有宏治五年李洪碑記

洪覺寺在杜煙村

五佛寺在流常村

案明宣德三年重建嘉靖二十九年重修有碑記

興教寺在山城村

邊仙寺在邊村

案舊曰紫雲觀明萬曆二十一年重修有邑人宋室碑記

同善寺在良黨村廢

華陽觀在武家莊

玉真觀在新村東

案明嘉靖間創建

國朝康熙五十八年重修嘉慶八年侯住徐進祿王全喜趙明李法名等重修

通明宮在東郭村

案元至正元年建明隆慶二年鄉耆徐平等建兩廊十間有邑人陳希南碑記崇禎十一年重修

國朝康熙三十一年乾隆八年續修嘉慶八年道士魏元善李永祿再修有香火地五十畝有峻極閣前有



鐵碑高二丈闊五尺四面鑄捐貲姓氏順治五年鄉民王舉等立後有蓬萊苑松柏三百八十餘株

### 玉皇廟二

一在王里長屯明宣德間王貴創建成化間張原萬曆時段希孔相繼重修有邑人副使江學詩碑記有香火地二十六畝

一在北石村康熙十一年李魁元等創建

### 三清玉帝閣在東青花村

案順治八年建有邑人王憲湯碑記

### 泰山行宮在故縣村

案明隆慶二年鄉人鄭鼎等建有邑人通判王義對

棗強縣志卷八 建置志

十四

### 碑記

### 碧霞元君廟二

一在崔母村明嘉靖二十三年譚聰孔釗等建

國朝順治十六年崔望山于吐雲修葺康熙三十四年監生李廣生等重修有行人閣中寬碑記乾隆四十三年重修有侍講秦和姚頤碑銘嘉慶六年生員楊信芳龍汝言張建中監生孫良儀等重修

一在衡店村明萬曆十七年張永年等建有舉人徐應元碑記

### 凌雲觀在西徘徊村

案舊曰玉皇閣明崇禎六年修



國朝乾隆三十六年監生賈武豹等重修有舉人姚許  
碑記

善應觀在水堤村

大悲閣在東關

案明萬曆二十三年建

國朝順治八年康熙四十年相繼重修